

Mesyuarat Pesaka ikut dasar lama

9 Harian (M)

1 AUG 1990

PERSEKUTUAN Silat Kebangsaan Malaysia (Pesaka) terpaksa akur dengan arahan Jabatan Pendaftaran Pertubuhan agar mengadakan mesyuarat agung berasaskan perlembagaan lama.

Setiausaha Pesaka, Abdul Rahman Hassan, berkata Pesaka masih menunggu surat rasmi kedua daripada Jabatan Pendaftaran Pertubuhan sebelum mengadakan mesyuarat majlis badan induk untuk menetapkan tarikh mesyuarat agung.

Katanya, Jabatan Pendaftaran Pertubuhan mengarahkan Pesaka mengadakan mesyuarat agung berpandukan perlembagaan lama kerana kegagalan badan induk silat kebangsaan mengadakan mesyuarat agung sebelum ini.

"Saya akan memanggil ahli majlis Pesaka secepat mungkin bagi menetapkan tarikh mesyuarat agung. Tetapi, kini saya masih menunggu arahan selanjutnya daripada Jabatan Pendaftaran Pertubuhan," jelas beliau.

Mac lalu, Pesaka membuat beberapa pindaan perlembagaan dan masih menunggu kelulusan sebelum mengadakan mesyuarat agung.

Sebelum ini *Harian Sukan* difahamkan, Menteri Besar Selangor, Tan Sri Muhammad Haji Mohd Taib dijangka bertanding merebut jawatan Presiden Pesaka yang kini disandang oleh Datuk Abdul Rahman Mahmud dari Johor.

Sejauh ini, Kelantan berminat mencalonkan Menteri Belia dan Sukan, Datuk Seri Najib Tun Razak, manakala Pahang mencadangkan Menteri Kebudayaan dan Pelancongan, Datuk Sabaruddin Chik, bertanding bagi jawatan Presiden.

Bagaimanapun kedua-dua menteri pusat itu mungkin menarik diri jika Tan Sri Muhammad bersedia untuk mengisi jawatan berkenaan.

Abdul Rahman berkata, Pesaka akan membuka pencalonan selepas menetapkan tarikh mesyuarat agung nanti.